



Minggu, 12 Mei 2024
Ogen: Sepanya 2:1-3



"Ope Denga"



W Ope denga" e me tema paksa tenengta wari enda, erpalasken Sepanya 2:1-3. Telu kali ituliskan nabi Sepanya kerna kata ope denga (ope denga kam ikabangken bagi segal; ope denga pernembah ate Tuhan si gara reh ku kam; ope denga seh warina IA ncidahken rawaNa). Kata ope denga ibenai alu kalimat: "*O bangsa si la meteh mela, rukurlah kam*". Kalimat enda e me kalimat perintah man bangsa Dibata, kalimat enda ningetken kerna lagu langkah si la mehuli si nggo ilakoken bangsa Dibata. Bangsa Dibata nggo nilah arah sura-sura Dibata, bangsaNa e ngeluh bagi sura-surana lanai ngikutken bagi si ngena ate Dibata. Perkatan Tuhan man bangsaNa; ope denga kam Ku ukum, jeralah dengen mulihlah kempak Dibata. Kekelengen Dibata tetap ituduhkan man bangsaNa aminna gia bangsa e megati lanai megiken Dibata; entah megati nilah arah Dibata nari. Dibata la erngena ate adi bangsaNa ndatken ukumen; emaka Dibata tetap encidahken kekelengenNa alu mpersingeti bangsaNa erkelang-kelangken nabiNa.

Ope denga kita cilaka perlu kita metenget i bas geluh enda; ope denga kita sakit perlu kita njaga pola makan bage pe pola nggeluh; ope denga kita rubat perlu kal sijaga gelah ula kita rubat; ope denga kita metua perlu si pesikap pusuh ras perukurenta gelah kenca seh pagi masana lanai kita sengget; ope denga kita erdahin perlu kal sidatken pemeteh arah kita erlajar; ope denga kita mbangun perlu kal si eteh asakai gegeh si nggo banci terpepulung kita guna mbangun. Metenget, megermet rasmediate jadi baik si ipebelin sope si nangdangi jadi.

Dibata Bapa si sembah kita e me Dibata si perkuah; ope denga idabuhkanNa ukumen man bangsaNa, ipersengetiNa gelah tetap kita i bas undang-undangNa. Mulihlah kempak Dibata maka si dat kesenangan bage pe kemalemen ate. Ula nari sura-suranta si pebentas tapi sura-sura Dibatalah si pebentas i bas geluhta; tentunya arah kita mpebentas sura-sura Dibata maka puluh me kita arah mara nari.